

## LAUDATIO RC UFENAU – 20 JAHRE STARK UND FROH

Liebs Geburtstagskind RC Ufenau,  
Liebi Gescht –

Wenn dr Summer ändlig do isch,  
Wenns warm wird und me drum au froh isch,  
S hett der letschti Schnee verwaiht,  
Wenn der Buur der Mischt usdrait,  
Dass es schmöggt – ihr wyssed wie  
Und s isch scho hell am Morge frieh,  
Wenn uf dr Wiese – näb de Hecke,  
Munter d Bliemli d Köppli strecke,  
Wenn ab und zue e Gwitter fallt  
Und düschter denn e Donner hallt ...  
Und denn, wenn yber Wald und Fäld  
Als wär är nid vo däre Wält  
Sich e Rägebooge zieht,  
As s aim so komisch wird ums Gmiet:

Denn isch amme gnau die Zyt  
Wo's die große Wunder git!

Und die hesch Du Dir userkohre,  
Ziemlig gnau vor zwanzig Johre.  
Als junge Club vo Rotary  
Und sithär sinn mir do derbii.

S isch e Männerwält sit Ursprung här,  
Drum hesch es du am Aafang schwär.

Nur Vätere hesch – derfür en masse  
Nid ei Mamme – s isch no krass.

Si heisse Kindlimaa, Oechslin, Schück und au  
Dr Andreas Schubarth isch e Maa – kei Frau!

S Kind wird vo Vätere geboore,  
Das het's scho gää vor zwanzig Joore.  
E Vorläufer vo LGBTQ und plus  
Rotary ish der Zyt vorus.

Und d Taufi – quasi d Charterfyrr  
Wär het's dänggt: die war auch hier!

Alli sinn koo vo noch und färrn  
Und alli hänn das Kind au gärn!

Me hett sogar mit Kanone gschosse –  
Der Schütz hett hütt no Summersprosse ...  
Denn bi alte Grät, es isch nid schön  
Kas syy, dass d Schüss no hinde göhn!

Es isch no gföhrlig, so Kanone  
Drum nimmt me hütt au lieber Drohne.

«Blut überströmt der Kanonier  
Stand er da ... nicht weit von hier.»  
So stohts in de Club Annalen  
Unter "Einsatz, Mut und Qualen.»  
«Der Schütz stand stramm, grinste verwegen  
Denn der Feind war unterlegen.  
Solche Männer, Kerle eben  
Die hats früher noch gegeben.  
Und Kanonen eben auch,  
Heut beides nicht mehr in Gebrauch.»

Was me jedefalls saage kaa,  
S Geburtstagskind das isch kein Maa.  
Es isch e wunderschöni Frau  
Mit em Name: «UFENAU»

UFENAU – was für e Name!  
Keck, subversiv e Bitz – de kasch es ahne  
Im puritanische Amerika  
Isch's nid e Name wo'd dörfsch haa.

Es mues en Ortschaftsname syy mit Poschtleitzahl  
Oder wenigstents e Tal.  
En Insle als Name isch Tabu,  
Das gits nid emol in Timbuktu.

Will's zwölfundertsytige Regelwärk das nid erlaubt ...  
Ganz unter uns: Mer hänn nid glaubt.

Mer hänn also kämpft für dy scheen Name  
Bis die z Chicago aaföhn lahme ...

*Us em entsprächende Email-Verkehr:*

To the board of Rotary in Chicago  
Referring to UFENAU al lago:

“Dear Mr. President, dear Sir  
All we say is true – ich schwör!  
Ufenau is a little City –  
And by the way it's very pretty.  
But what is important in däm Fall  
It also has a Postleitzahl  
8808 given as such  
Therefor we thank you very much”

D Amis hänn bigää – s isch z bigriesse,  
Sunscht hätte mir d Kanone nomol laade miesse!

Kuum gebore und tauft mit Name

Mien e Huffe Kinder aane.

Sie heisse Aernscht, Max, Karin, Eugen, Helmut, Claudia, Hansueli, Bruno, Urs,  
Claudio, Barbara, Edwin, Ken, Thomas, Gisela, Felix, Andreas **und so fort**

S isch quasi e ganze Kinderhort ...

Und denn gits eine, dä passt uff,

Will denn gits sicher au kei Puff.

Und sälle isch denn letzschtemänd

Für ei Joor dr Presidänt.

Jä, es wäggsled jedes Joor,

Will länger machsch das nid, dasch wohr.

Der Erschti wo das mache duet

Isch der Andreas – dä isch guet.

Denn, d Barbara, Aernschd, Gisela, Eugen ...

So goot das wyter über d Johre,

Ich han der Überblick verloore.

Gmacht hännns alli guet – Hejo!

E paar hänn e Orde überkoo.

E paar e keine, das gits au.

Der eint isch e Maa, die ander Frau.

Ein nimmts lyycht, die ander strub

Und wieder ein verlosst der Club.

S isch alles irgendwie scho vorkoo

Über all die zwanzig Joor do.

Bsunders blyybe isch mer eine,  
Will dä het's gmacht wie sunscht e keine:  
Mit viil Härz, Charme und Verstand,  
Mit Humor und einere Hand.  
E Daag vor em Meeting – s goot eso:  
Hett är s Rotary Biechli gnoo  
Und lütet denn e jedam aa,  
Schnurrt en z Bode bis dä kaa  
Am näggschte Daag ins Panorama,  
Will sunscht gits e riise Drama.

Los Aernscht, i weiss, s goot der nid guet  
Aber hütt ziehn ych der Huet.  
Am Rotary-Mount Rushmore Firmamänt  
Bisch du der beschti Presidänt!

Wenn ych so zrugg lueg über d Johr ...  
I main es kunnt e huffe vor.  
Und s isch nid alles ganz perfäggd  
Vo dyne Rotary-Projäggd.

Als erschts duesch neyme wyt im Oschte  
Sone Coiffeur-Salon poschte ...  
Nid e mänge hett en gseh.  
E Matching Grant het's au nid geh.  
Denn Hilf für d Fürwehr z Gadme Oscht,  
Beatrice Egli singt – und Proscht!  
Öppis baue uf ere Alp ...  
Ich glaub fertig worde isch's nur halb.

S isch glyych, de hilfsch und s isch dr Wärt.  
De bisch in Freyebach am Märt,  
In Uznach bisch für Kinder do,  
E Heim in Filzbach ebeso  
Und denn schiggsch au still und leise  
Gäld nach Honduras für die Waise.

Sogar der wältwyt Presidänt  
Sitzt an dym Tisch no letschtemänd

Und mit em Snétberger und syne Junge  
Isch dir wirkligg öppis glunge.  
E Wuche mit Konzärt – s hett Klass  
D Musiggwuche z Gstaad - dernäbe blass.

Und denn: wär isch nid alles koo  
Als Gescht zue dir – i main eso  
All die Prominänz – do frogi  
Vo Peter Kraus bis Adolf Ogi  
Grübel, Riedle, Gubser au ...

De bisch mit ys in Elefantebau,  
Wo der Stefan – s isch nid ohne  
Baut het z Ziiri für Millione.

Mer sinn zämme dur dr Schnee  
Nach Basel um Theater z gseh.

Hesch mit ys danzt und Yoga gmacht  
Und denn hänn mer zämme au viil glacht.

Mer sinn uf d Burg und hänn fein gässe  
Und viles hani au vergässe.

Und während der Corona-Zyt – alles das per Video  
E paar mache das au Hütt no so.

A propos Aesse – mues ich saage:  
Liebi goht jo dur dr Maage.  
Und ab und zue e feine Wyy  
Bi Rotary mues das so syy.  
Do wotti em Paul e Kränzli winde,  
Will Bessers kame niene finde.

Är hett di ufgnoo – das muesch gsee,  
Denn nach em Leutschehuus – Oje  
Bisch uf dr Stross – e Homeless quasi  
Nüt z Aesse, z trinke – Tabula rasi!  
Was hätts gää – was für e Drama  
Ohni Paul und s Panorama!

Apropos dyne Kinder no  
Bi Kinder isch es jo eso:  
Die aine mache nur Problem  
Mit andere do isches scheen  
Und denn gits au no die wo denne  
Aimol ganz gross usekemme.

Und mit der Claudia – do hesch Glück  
Mit ihre glingt e Meischerstück  
Denn eher goht e Kameel durs Nodelöhr  
Als e Frau wird Gouvernör!

Hesch's guet gmacht, liebi Ufenau!

Bisch erwachse worde au.

Bisch jetzt immerhi scho zwanzig

No immer frisch – und noni ranzig.

De hilfsch wo'd kasch – und das isch wichtig

Und wie de s machsch isch meischtens richtig.

Mer wünsche dir drum zue dym Fescht

Vo ganzem Härze s ALLERBESCHT.

Und s Allerbescht, das ghört sich au

Für e sone bsundri Frau.

Blyb witer so, wie mir di kenne

Dr allerbeschti Club im Renne.

Blyb witerhi ganz aifach zwäg!

Mer wünsche uff dr wyter Wäg,

Weisheit, Muet und au viil Kraft

Wo no mängi Hürde schafft

Denn du bisch – ich blyb derby

Der beschti Club bi Rotary.

Im Name vo dine Kinder

HAPPY BIRTHDAY!

Michi

(ex Presidänt, ex Progrämmler, ex Bulletinier)

Im Juni 2023